

Was merr su babbeld

Honnes, hosde se gefunne?
Naa.
Wo hosden gesucht?
Im Keller unn uffem Speicher.
Die misst awwer doo soi, in su ooner Schachtel.
Villeischd deest du mol gugge?
Gleich. Awwer brauchtsde se werklisch?
Sunnst deet isch se nitt suche.
Hosde schunn meddem Schorsch geredd?
Ja.
Unn was moonderr, de Schorsch?
E gut Idee.
Isch moon, ihr wärt ferr su ebbes ze alt.
Ze alt? Werklisch nitt.
Ja, weils um Traditione gieht.
Ewe, um Traditione. Die Kerb iss e Tradition.
Abgeschafft sollse joo nitt wernn.
Dess habb isch awwer grad su gelese.
No ja, oon Daach späder hosde gelese ...
... die werrd nitt abgeschafft, nor nitt bezahlt.
Die Stadt hott koo Geld.
Doodeferr muss merr Geld hawwe.
Ferr Traditione?
Ja, grad ferr Traditione. Jetzt such emol.
Gleich. Isch moon, dess solle die Junge mache.
Die Kerweborsch wernn schunn ebbes mache.
Dess iss aach gut. Also loss die Bosse.
Bosse? Dess sinn koo Bosse.
Was moonsde, wie vill mettmache deede?
Mir sinn noch iwwer zwonnsisch Kerweborsch.
Ja, Johrgong finfundreißisch.
No unn?
Vunn dene mache nitt vill mett.
Unn wenn merr nor finf sinn, die Zeidung ...
Ja, die kimmt unn dut eich fotografiern.
Mir misse donn aach e Redd halle.
Unn wer soll die Redd halle?
Ooner werrds schunn mache.
Unn was willsde saache?
Isch saach, die Kerb ...
Also doch du?
Villeischd aach enn onnern.
Ja.
Uff jeden Fall misse merr die Mahnwach halle.

Unn wo?
Ei unne vorm Herrsch, wo sunnst?
Isch gieh doo nitt mett.
Du warst joo aach nitt moi Kerwemädche.
Naa.
Unn außerdem hawwe mir sellemols ...
... ja, ja, alles alloo gemacht.
Ohne Ehrenkerweborsch unn Ehrenkerweparre.
De Beiemoosder Pein awwer ...
... der hott vumm Toni enn Äbbelwoi kriecht.
Vunn eierm Kerwevadder!.
Ja. Jetz such awwer mol.
Hier isse.
Die sieht noch gut aus.
Bassderr awwer nimmi.
Naa, die basst nimmi.
Unn? Soll isch se weider mache?
Loss erst emol. Awwer moonsde isch deet ohne
moi Kerweborschkabb e Mahnwach ferr die
Kerb mache? Jetz will isch de erst emol mett
dene onnern telefoniern, mol gugge, wie vill
mettmache dun. Wenn nor de Schorsch unn
isch iwwerisch bleiwe, donn losse merr die
Mahnwach soi. Donn setz isch die Kabb nor
noch dehoom erum uff.

Eiern Honnes